



La presidenta dal Cussegl grond, Aita Zanetti, ha engrazià a chaschun da l'avertura da la sessiun a la tschintg- e sisavla classa da la scola da Sent ed al scolast Andri Gritti (sanester) per l'engaschi a favur dals umans pertutgads da la guerra en l'Ucraina. Era il cusseglier guvernativ Jon Domenic Parolini (dretg) als ha engrazià tar lur visita mardi a Cuira.

FOTO LIVIA MAUERHOFER

# «Pussanza gudagnada cun violenza fa a lunga vista naufragi»

La presidenta dal Cussegl grond Aita Zanetti ha regurdà il mardi passà en ses pled d'avertura da la sessiun d'avrigl dal Cussegl grond a la guerra en l'Ucraina.

ANDREAS CADONAU/FMR

Las colurs blau e mellen da la Ucraina èn stadas en il center mardi suentermezdi, tar il pled d'avertura da la sessiun d'avrigl da la presidenta dal Cussegl grond, *Aita Zanetti*. Las colurs che simboliseschan in pajais attatgà das ses pussant vischin, ina attatga cunter il dretg internaziunal. «Jau stoss conceder, avant ils 24 da favrer nun hai jau ni pensà ni spetgà che l'escalaziun da violenza e destrucziun saja pussaivla en l'Europa dal 21avel tschientaner.» La presidenta dal Cussegl grond ha concedì d'avair fadia dad ordinar ils patratgs en connex cun ils schabetgs en l'Ucraina. «Jau hai pers il pled visavi al fatg ch'ils dretgs fundamentals sco l'agid umanitar per las persunas pertutgadas da la guerra na vegnan betg concedids.» La presidenta dal Cussegl grond ha

menziunà il maletgs da citads bumbardadas che laschan imaginar la gronda destrucziun. Ella ha ditg a deputadas e deputads che davos las cifras da victimas stettian umans che survegnian, grazia a las medias socialas, ina identitad, ina istorgia ed in num. «Il blau e mellen da la Ucraina regorda a medem temp a quai che nus dastgain giudair en noss pajais e che tut quai na sa chapescha betg da sasez.»

## Democrazia e pasch sociala

Per Aita Zanetti èn la democrazia e la pasch sociala da gronda valur e da quella stoppian ins avair quità. La presidenta dal Cussegl grond ha cità l'emprim artitgel da la costituziun chantunala che descriva il Chantun sco stadi da dretg, democratic e social. «Questa emprima frasa è il fundament da nossa cuminanza. Ina

cuminanza che ha mussà las emnas passadas che sias valurs vegnan vividas.» Per simbol da la prontadad da la populaziun da porscher agid ha Aita Zanetti envidà il mardi passà en il Cussegl grond la tschintg- e sisavla classa da la scola da Sent cun ses scolast, *Andri Gritti*. Cun il scolast che ha dal rest era dà scola a la presidenta dal Cussegl grond. «Charas scolaras e chars scolaras, cun vossa acziun essas vus in exempel per nus creschids ed era perquai engraziel jau a vus fitg.» Scolaras e scolaras han instradà in apero la fin da mars a favur da la Ucraina e recalgtgà passa 4000 francs per las victimas da la guerra. En connex cun quell'acziun ha perquai ditg Aita Zanetti a la fin da ses pled: «Era perquai ristg jau a la fin da mes pled ina tesa. La pussanza gudagnada entras violenza fa a lunga vista naufragi.»